



Sesida dals

13 d'avust 2019

Communitgà ils

14 d'avust 2019

Protocol nr.

560

Dumonda Thomann-Frank

concernent il sustegn per scolaras e scolars cun legastenia u discalculia

Resposta da la regenza

Il sustegn da scolaras e scolars (SeS) cun legastenia u discalculia è – sin basa da la lescha davart las scolas popularas dal chantun Grischun dals 21 da mars 2012 (lescha da scola; DG 421.000) – chausa dals purtaders da scola e vegn realisà en il rom da las mesiras simplas da la pedagogia speziala.

Davart las singulas dumondas po la regenza prender posiziun sco suonda:

Tar la dumonda 1: En l'art. 43 da la lescha da scola regla il chantun en moda surordinada che SeS cun in basegn spezial da promoziun han il dretg da mesiras da la pedagogia speziala. La garanzia, la realisaziun sco er l'ordinaziun da las mesiras simplas da la pedagogia speziala èn – tenor l'art. 47 al. 1 sco er tenor l'art. 48 al. 1 da la lescha da scola – chausa dals purtaders da scola. En il rom da la promoziun integrativa senza adattaziun da las finamiras da l'instrucziun quinta tar las mesiras simplas da la pedagogia speziala en spezial la promoziun en cas da flaiwezzas parzialas da la prestaziun sco discalculia u legastenia. Uschia èn ils singuls purtaders da scola responsabels d'identifitgar il basegn dals SeS che han difficultads correspondentas e da cumbatter adequatamain cunter talas en l'instrucziun cun agid da resursas e da furmas da promoziun adattadas. Las persunas dal fatg responsabels èn las pedagogas curativas ed ils pedagogs curativs da scola.

Il chantun fa la surveglianza. Sa basond sin l'art. 91 da la lescha da scola ademplescha l'inspecturat da scola – en il rom da las structuras regularas – tranter auter la surveglianza sco er la controlla da la qualidad en il sector da las mesiras simplas da la pedagogia speziala. Plinavant porscha l'inspecturat da scola differents servetschs che sustegnan ils purtaders da scola da garantir la promoziun necessaria. Per las personas d'instrucziun sco er per las direcziuns da scola metta el a disposiziun ina cussegliaziun professiunala e stat a disposiziun en cas da dumondas da vart dals purtaders da scola. En cas da reclamaziuns da personas responsablas per l'educaziun vegn examinada la situaziun al lieu ed i vegnan introducidas mesiras correspundentas en cas da basegn. Las personas responsablas per l'educaziun e las personas d'instrucziun pon ultra da quai drizzar lur dumondas da tut temp al servetsch psicologic da scola e sa laschar cussegliar. Tenor l'art. 48 al. 1 lit. a da l'ordinaziun tar la lescha da scola dals 25 da settember 2012 (ordinaziun da scola; DG 421.010) sclerescha quest servetsch ils fatgs en cas d'intschertezzas u da dischaccord davart il basegn da promoziun spezial, sco p.ex. per sclerir la dumonda, sch'igl è avant maun ina legastenia u ina discalculia. Finalmain han las personas responsablas per l'educaziun la pussaivladad d'inchaminar la via giudiziala, eventualmain sin basa da l'art. 95 da la lescha da scola.

Tar la dumonda 2: Il chantun n'ha naginas cifras davart il scleriment e davart la realisaziun da mesiras simplas da la pedagogia speziala, en spezial betg per SeS cun ina legastenia u cun ina discalculia. Sco mesira integrala da la promoziun en dumondas da la pedagogia speziala per SeS cun differents basegns èn l'ordinaziun e la realisaziun da questas mesiras chausa dals singuls purtaders da scola.



En num da la Regenza

Il president:

Il chancelier:

Dr. Jon Domenic Parolini

Daniel Spadin